


Ausz was ursach der Comet im

31. Jar erschin/entsprungen sein.



ES schreybt Ptholomeus im andern buch seines Quadripartit/wen finsternus Sonnen vnd des Mons geschehen/vnd Mars regierer sey über solch finsternus/so erschein gemeinglich seltsam vnd wunderlich fewrwerck/sonderlich wen ir würckung am fröfftigsten seind inn luffte/So schreybt auch Mesahalla das er nye kein finsternus der Sonnen gesehen hab/es sey alweg etwas wunderlich darnach gefolgt/So ist es nun aller welt offenbar/dz zwofinsternus/Sonnē vñ des Mons geschehen seinn im 30 Jar/in einem fewrigen zaichen/vnd beyd oberster regierer (wie dan Astrologi angezaigt habenn) Mars gewesen sey / Ist nicht

so groß zuuerwundern / das ein Comet vnd ander fewrig erscheinung gesehen sein worden in den lufften/Als dan geschē ist am ende des Mertzē / in der woche Judica des 31. Jars/so payder finsternus würckung schier am fröfftigsten gewest/dan im Lungaw auß glaubwürdigē personen anzaigē/erschinen ist/ein solcher stern mit dreyen schwertē/wie hie bey stehet/vnd etlich nacht vnd morgen nacheinander von vil personen gesehen worden.